

- 139 Գ., էջ 430:
- 140 Տե՛ս հետաքրքրական, բայց ոչ համապարփակ եւ կամայական մեմագրութիւնը՝ Պ. Սեւակ, *Երկեր, Վարուժանի պոէզիան*, հտ. Գ, Երեւան, 1983, էջ 471-550:
- 141 Տե՛ս հմտալից, բայց ոչ լման դասախօսութիւնը՝ Լ. Լ. Զեքիեան, *Դանիէլ Վարուժան բանաստեղծ եւ արուեստագէտ*, «Բազմավէպ», 1984, էջ 10-25:
- 142 Տե՛ս շահեկան, բայց անկատար յօդուածը՝ Սիլվա Յովհաննիսեան, Գեղարհիտական իտալի վարուժանեան ըմբռնումները, «Ազդակ», Պէյրոս, 16 Դեկտեմբեր, 1996, էջ 5բ-դ:
- 143 Բարեացակամ եւ ազնուախոհ խորհրդատու Դ. Վարուժանի խրատին հաւանաբար անալոլ՝ Ս. Երեցեան լոյս չընծայեց իր քերթուածներուն հաւաքածոն:
- 144 Գ., էջ 435-436:
- 145 Տե՛ս Ս. Զ. Գրիգորեան, *Գիճու երգը ըստ Դանիէլ Վարուժանի եւ Վահագն Դաւթեանի*, «Բանբեր Երեւանի Համալսարանի», թիւ 3 (81), 1993, էջ 173-182:
- 146 Գ., էջ 456-457:
- 147 Գ., էջ 446:
- 148 Գ., էջ 413:
- 149 Գ., էջ 445:
- 150 Գ., էջ 459:
- 151 Գ., էջ 277:
- 152 Գ., էջ 328:
- 153 «Դանիէլ Վարուժան, Երկերի լիակատար ժողովածուի» երրորդ հատորին մէջ՝ «Բնագրերում յիշատակուած պարբերականներ» վերտառութեան տակ, 40 անուններ կան (Գ., էջ 707-708):
- 154 «Գեղարուեստ» գրական, գեղարուեստական, երաժշտական, ակարագարող հանդէս է՝ հրատարակուած Թիֆլիսի մէջ, 1908-1909, 1911, 1913, 1917 եւ 1921: Խմբագիր-հրատարակիչն էր Գ. Լեւոնեան (տե՛ս Մ. Ա. Բաբլոյեան, *Հայ պարբերական մամուլը*, Մատենագիտական համահաւաք ցուցակ (1794-1980), Երեւան, 1986, էջ 70բ, թիւ 463):
- 155 Դ. Վարուժան զրկեց «...Ո՛վ Լալագէ» քերթուածը, զոր երկնէց 28 Հոկտեմբեր 1910-ին: Տպուեցաւ «Գեղարուեստ»-ի մէջ (1911, թիւ 4, էջ 94-96):
- 156 Գ., էջ 438:
- 157 Հմմտ. Գ., էջ 455:
- 158 Գ., էջ 457:

- 159 «Ծանթ» գրական ու գեղարուեստական հանդէս է՝ հրատարակուած Կ. Պոլիս, 1911-1915 եւ 1918-1919: Արտօնատէր-խմբագիրն էր Մ. Պարսամեան (տե՛ս Մ. Ա. Բաբլոյեան, անդ, էջ 90ա, թիւ 668):
- 160 «Ատրուշան» ծածկանունը կը գործածէր Լ. Սիմոն Վրդ. Երեմեան, որուն մասին տե՛ս Ասատուր Փաշայեան, *Սիմոն Երեմեանի գիտական եւ գրական ծառայութիւնը*, ՊԲՀ, թիւ 3 (167), Երեւան, 2004, էջ 131-147:
- 161 Գ., էջ 444 եւ տե՛ս էջ 448:
- 162 «Հայ գրականութիւն» գրական, գիտական ու գեղարուեստական ամսօրեայ հանդէս է՝ հրատարակուած Չմիտնիայի մէջ, 1911-1914: Հիմնադիր-խմբագիրն էր Զ. Գազազեան (տե՛ս Մ. Ա. Բաբլոյեան, անդ, էջ 88բ-89ա, թիւ 656):
- 163 Գ., էջ 458:
- 164 Տե՛ս Գ., էջ 402-403 եւ 461:
- 165 «Դանիէլ Վարուժանէն իր սիրելի բարեկամին» Թեոդիկին ողջո՛յն, պարտական եմ քեզի, սիրելիս, պարտական եմ խօսքեր, զոր երկար ժամանակ պահեցի սրտիս մէջ եւ պատառ մը թողոթ չգտայ կարծես զանոնք ծրարելու համար» (Գ., էջ 449, նամակ, «15 Մայիս, 1912, Թոգաթ»):
- 166 Այս գրական, պատմական ու գիտական տարեգիրքը լոյս տեսաւ Կ. Պոլիս, 1907-1923, Փարիզ, 1924, Վիեննա, 1925, Վեներտիկ, 1926 եւ Փարիզ, 1927-1929 (տե՛ս Մ. Ա. Բաբլոյեան, անդ, էջ 66ա, թիւ 412):
- 167 Գ., էջ 423 եւ *Ամէնուն տարեցոյցը*, Կ. Պոլիս, 1911, էջ 3:
- 168 Գ., էջ 439 եւ *Ամէնուն տարեցոյցը*, Կ. Պոլիս, 1912, էջ 6:
- 169 Այս վերտառութեամբ՝ Պոլիս, 1912-ի սկիզբը, Թեոդիկ հրատարակեց իր արձակ գրութիւններուն հաւաքածոն:
- 170 Գ., էջ 445 եւ *Ամէնուն տարեցոյցը*, Կ. Պոլիս, 1913, էջ 5:
- 171 Գ., էջ 466 եւ *Ամէնուն տարեցոյցը*, Կ. Պոլիս, 1916-1920, էջ 9:
- 172 Վ. Գաբրիէլեան, անդ, էջ 98-99:
- 173 Գ., էջ 464:
- 174 Լ. Ե. Տէր-Ղազարեան, անդ, էջ 56, թիւ 393:

ՊՕՂՈՍ ՆՈՒՊԱՐԸ ԵՒ ՀԱՅՎԱԿԱՆ ՀԱՐՑԻ ԶԱՐԳԱՑՈՒՄՆԵՐԸ
1912-1921 ԹԹ.

Սամուէլ Պողոսեան

1912-1921 թուականները Հայոց պատմութեան բարդ ու հակասական ժամանակաշրջանն է. մեր ժողովուրդը իր մեծ երազանքների ճանապարհին ունեցաւ խոշոր վայրիվերումներ, անցաւ Եղեռնի գողգոթայով, ձեռք բերեց անկախութիւն եւ անմիջապէս էլ կորցրեց այն՝ ապրելով դառն յուսախաբութիւններ:

Այս դժուարին շրջանում Հայ ազգային պատմութեան ղեկավարն էր եգիպտահայ մեծահարուստ եւ բարերար Պողոս Նուպար փաշան (1851-1930), որը եւրոպական տէրութիւնների առջեւ փորձում էր պաշտպանել Հայկական Հարցն ու Հայութեան շահերը:

1912 թ. նոյեմբերի 10-ին Ամենայն Հայոց Կաթողիկոս Գէորգ V-ի կոնդակով՝ Պողոս Նուպար փաշան նշանակուեց եւրոպական տէրութիւններում Կաթողիկոսի լիազօր եւ պէտք է բարձրացնէր Հայկական Հարցը: Այնուհետեւ մինչեւ 1921 թ. Պ. Նուպարի գործունէութիւնն ու ծրագրերն անմիջականօրէն կապուեցին Հայկական Հարցի պատմութեան հետ: Փորձութիւններով լի այդ ժամանակաշրջանում Հայութեան առջեւ դրուած խնդիրները եւ Պ. Նուպարի ծրագրերը փոփոխութեան էին ենթարկուում միջազգային իրավիճակն համապատասխան՝ բարենորոգումների համեստ պահանջներից վերածուելով «ծովից ծով» Հայկական անկախ պետութիւն կազմելու երազանքի:

Պ. Նուպարը համազգային, համամարդկային չափանիշների գործիչ էր, որը պատիւ կը բերէր ամէն ազգի. եւրոպական կրթութեամբ, լայն մտահորիզոնի տէր անձ, անսահման հայրենասէր եւ բարե-

գործ, անխոնջ, անյոգնաբեկ ազգային գործիչ, ճանաչուած ֆինանսական, քաղաքական եւ մտաւորական շրջաններում: Նա Հայկական Հարցի յաջողութեան համար ներդրեց իր հարստութիւնն ու ազդեցութիւնը, լեզուն ու գրիչը: Ազգային պատմութեան նախագահի պաշտօնը ստանձնելուց յետոյ նա դարձաւ ամենաժողովրդական հայը: Երուանդ Օտեանը գրում է. «Ալ լոկ հարուստ բարերար մը ըլլալէ դադրեցաւ անիկա ու դարձաւ յոսոյ փարոս մը, դէպի ուր ուղղուեցան ամէնուն աչքերը»²:

Պ. Նուպարը սկզբնական շրջանում հանդէս էր գալիս Արեւմտեան Հայաստանում բարենորոգումներ անցկացնելու աւելի համեստ պահանջներով: Նրա ծրագրերը բխում էր 1878 թ. Բեռլինի պայմանագրի 61-րդ յօդուածի³ եւ 1895 թ. Մայիսեան բարենորոգումների նախագծի⁴ սկզբունքներից: Ըստ դրանց՝ Հայկական վեց նահանգները (Էրզրում, Վան, Բիթլիս, Խարբերդ, Դիարբէքիր, Սեբաստիա) միաւորուելու էին մէկ երկրամասի մէջ, ուր թրքական կառավարութիւնը նշանակելու էր ընդհանուր կառավարիչ, որին կից նշանակուելու էին եւրոպացի խորհրդականներ՝ լայն լիազօրութիւններով: Այդ վարչութեան վերահսկողութեամբ վերակազմուելու էին ոստիկանութիւնը եւ դատարանները, բարեփոխուելու էր հարկային եւ ֆինանսական համակարգը, ետ էին վերադարձուելու հայերից զբաւուած հողերը, կառուցուելու էին ճանապարհներ, որի հետեւանքով երկրամասում կը հաստատուէր համեմատական ապահովութիւն եւ արդարութիւն, կը բարելաւուէր տնտեսական

դրույթները: Իսկ եւրոպական վեց տէրու-
թիւնների ներկայացուցիչներից կազմուած
յանձնաժողովը հսկելու էր բարենորոգում-
ների իրականացման ընթացքը⁵:

Նա ձգտում էր Արեւմտեան Հայաս-
տանում վերացնել անիշխանութիւնը, Հա-
յերի համար ձեռք բերել կեանքի, գոյքի ու
պատուի ապահովութիւն: Միաժամանակ
Ազգային պատուիրակութեան նախագահը
փորձում էր բարենորոգումների օգուտնե-
րը բացատրել թրքական կողմին՝ գիտակ-
ցելով, որ առանց թուրքերի համաձայնու-
թեան ոչ մի բարենորոգում էլ չէր իրակա-
նացուելու: Նա պնդում էր բարենորոգում-
ների հարցում եւրոպական վերահսկողու-
թեան վրայ, քանի որ, ինչպէս պատմու-
թիւնն էր ցոյց տուել, Օսմանեան կայսրու-
թիւնում առանց արտաքին հսկողութեան
բարենորոգումները չէին գործադրուում
կամ էլ կիսատ էին մնում⁶:

Բարենորոգումների ծրագիր կազմեց
նաեւ Կ. Պոլսի Ապահովութեան խորհուր-
դը⁷ եւ ուղարկեց Պ. Նուպարին: Պարզուեց,
սակայն, որ էական տարբերութիւններ կա-
յին վերջինիս եւ Կ. Պոլսի ծրագրերում, ո-
րում ուրուագծուած էր ապագայ ինքնա-
վար Հայաստանի հեռանկարը: Սակայն Պ.
Նուպարը վաղաժամ եւ անիրագործելի էր
համարում այդ ծրագիրը:

Միասնական ծրագիր կազմելու հա-
մար Կ. Պոլսից Փարիզ մեկնեց Ապահովու-
թեան խորհրդի քարտուղար, դաշնակցա-
կան գործիչ Վահան Փափագեանը (Կոմս):
Երկարատեւ բանակցութիւններից յետոյ
(1913-ի փետրուար-մարտ), ի վերջոյ, կա-
յացուեց համաձայնութիւն, ըստ որի հայ-
կական վեց վիլայէթները միաւորուելու
էին մէկ երկրամասի մէջ, որից դուրս էին
թողնելու մահադատականներով բնակեցուած
ծայրամասային որոշ շրջաններ, սուլթանը
տէրութիւնների համաձայնութեամբ նշա-
նակելու էր եւրոպացի ընդհանուր կառա-
վարիչ, որն ունենալու էր լայն լիազօրու-

թիւններ, իսկ տեղական խորհուրդներում
եւ պաշտօններում քրիստոնեաներն ու
մահադականները ստանալու էին հաւա-
սար տեղեր:

Այդ ծրագիրն ուղարկուեց Պետեր-
բուրգ՝ ռուսական կառավարութեան հա-
ւանութիւնը ստանալու, որից յետոյ պաշ-
տօնապէս ներկայացուելու էր միւս տէրու-
թիւններին⁸: Սակայն ռուսական կողմը ո-
րոշեց իր ձեռքն առնել նախաձեռնութիւ-
նը եւ բարենորոգումների ծրագիրը պաշ-
տօնապէս ներկայացրեց տէրութիւնների
քննարկմանը: Պ. Նուպարի եւ Պատրիար-
քարանի կազմած ծրագիրը Կ. Պոլսի ռու-
սական դեսպան Մաքսիմ Գիրսի յանձնա-
րարութեամբ դեսպանատան առաջին
թարգման Անդրէյ Մանդելշտամը աննշան
փոփոխութիւնների ենթարկեց⁹, եւ այն
վեց տէրութիւնների ներկայացուցիչների
կողմից 1913 թ. յուլիսի 3-23-ը քննար-
կուեց Ենի Բէյոյում՝ Կ. Պոլսի աւստրո-
հունգարական դեսպանատանը: Սակայն
բանակցութիւնները արդիւնք չունեցան
ռուս-գերմանական հակասութիւնների հե-
տեւանքով: Ռուսաստանին քիչ թէ շատ ա-
ջակցում էին Անգլիան եւ Ֆրանսիան,
Գերմանիային՝ Իտալիան եւ Աւստրո-Հուն-
գարիան:

Հայկական հարցը յայտնուեց մեծ տէ-
րութիւնների շահերի հակասութեան ոլոր-
տում, եւ վտանգ կար, որ կրկին լուծում չի
ստանայ: Երկարատեւ դիւանագիտական
պայքարից եւ բանակցութիւններից յետոյ,
որում մեծ էր նաեւ Հայ ազգային պա-
տուիրակութեան նախագահի դերը, 1914
թ. յունուարի 26-ին կնքուեց ռուս-թրքա-
կան համաձայնագիր Հայկական բարենո-
րոգումների վերաբերեալ¹⁰:

Այդ համաձայնագրով Արեւմտեան
Հայաստանը բաժանուելու էր երկու նա-
հանգների. առաջին՝ Վան, Բիթլիս, Խար-
բերդ, Դիարբէքիր, եւ երկրորդ՝ Էրզրում,
Սեբաստիա, Տրապիզոն: Ինչպէս տեսնում

ենք, հայկական տարածքներին միացուած
էր գլխաւորապէս մահադականներով
բնակեցուած Տրապիզոնի վիլայէթը, որով
արհեստականօրէն ստեղծուած էր մահադե-
դական մեծամասնութիւն: Տէրութիւնների
առաջարկած թեկնածուներից սուլթանը 10
տարով նշանակելու էր ընդհանուր կառա-
վարիչներ՝ լայն լիազօրութիւններով:
Նրանք լուծելու էին հողային հարցերը,
նրանց էին ենթարկուելու վարչական, դա-
տական, ոստիկանական իշխանութիւննե-
րը: Օրէնքները հրապարակուելու էին տե-
ղական լեզուներով, բիւջէից լուսաւորու-
թեան համար ազգային համայնքներին
յատկացուելու էր այնքան գումար, որքան
նրանք այդ նպատակով հարկ կը մուծէին:
Զինակոչիկները ծառայելու էին նահանգ-
ների տարածքում: Վանի, Բիթլիսի, Էրզ-
րումի ընդհանուր խորհուրդներում քրիս-
տոնեաները եւ մահադականները ստանա-
լու էին հաւասար տեղեր, միւս նահանգնե-
րում կիրառուելու էր համեմատական
սկզբունքը, իսկ վարչական խորհուրդնե-
րում եւ պաշտօններում կիրառուելու էր
հաւասարութեան սկզբունքը:

Այսպիսով, Ազգային պատուիրակու-
թեան եւ ռուսական կառավարութեան եր-
կարտեւ ու յամառ ջանքերի շնորհիւ
թուրքերից կորզուեց բարենորոգումների
բաւական համեստ յաւանութիւններով
համաձայնագիր: Չնայած դրա սկզբունք-
ները չէին համապատասխանում բարենո-
րոգումների վերաբերեալ հայկական կողմի
սկզբնական պատկերացումներին, սակայն
այն, այնուհանդերձ, որոշ բարելաւումնե-
րի յոյս էր ներշնչում: Պէտք է նշել, որ Պ.
Նուպարը, ծանօթ լինելով թրքական իշ-
խանութիւնների բարքերին ու գործելա-
կերպին, վստահ չէր, որ համաձայնագրի
կէտերը կը գործադրուեն, եւ ջանք չխնա-
յեց, որպէսզի թուրքերին համոզի դրանց
օգտակարութիւնը Օսմանեան կայսրու-
թեան համար:

Սակայն թուրքերը խախտեցին նաեւ
այդ համաձայնագիրը եւ ընդհանուր կա-
ռավարիչների հետ մայիսի 10-ին կնքած
պայմանագրերով խիստ սահմանափակե-
ցին վերջիններիս իրաւունքները¹¹:

Պ. Նուպարը յունուարի 26-ի համա-
ձայնագրի խախտման առթիւ բողոքեց
Գերմանիայի եւ Ֆրանսիայի կառավարու-
թիւններին, իսկ յունիսի 13-ին Պետեր-
բուրգում հանդիպեց Ռուսաստանի արտա-
քին գործոց նախարար Ս. Սազոնովի
հետ¹²: Ռուսական կառավարութեանն ուղ-
ղուած յուշագրում Ազգային պատուիրա-
կութեան նախագահը խիստ քննադատու-
թեան ենթարկեց միջազգային իրաւունքի
նորմերի՝ թուրքերի ոտնայարման փաս-
տը¹³:

Սակայն նրա ջանքերն ու յոյսերը ի-
զուր էին...

1914 թ. օգոստոսին սկսուեց Առաջին
աշխարհամարտը, որը նոր արհաւիրքներ
էր նախապատրաստել հայ ժողովրդի հա-
մար: Թրքական իշխանութիւնները մի
կողմ դրեցին բարենորոգումների համա-
ձայնագիրը եւ որոշեցին Հայկական հարցը
լուծել՝ բնաջնջելով հայ ժողովրդին:

Ազգային քաղաքական շրջանակնե-
րում դեռ անորոշ յոյս էին տածում, որ
պատերազմից յետոյ Արեւմտեան Հայաս-
տանին եւ Կիլիկիային ինքնավարութիւն
կը տրուի: Այդ հարցով Ամենայն Հայոց
կաթողիկոս Գէորգ V Սուրէնեանցը դիմեց
Կովկասի փոխարքայ Վորոնցով-Դաշկո-
վին¹⁴ եւ Նիկոլայ II ցարին¹⁵:

Իսկ 1915 թ. փետրուարին Պ. Նուպա-
րը «Պատերազմը եւ Կիլիկիայի հայերը»
խորագրով յուշագիր¹⁶ ներկայացրեց Ե-
գիպտոսի անգլիական իշխանութիւններին,
ուր պահանջում էր պատերազմից յետոյ
ինքնավարութիւն շնորհել Հայաստանին
ու Կիլիկիային: Այդ յուշագրով Պ. Նուպա-
րը առաջ էր քաշում Կիլիկիայում Անտան-
տի երկրների զօրքեր ուղարկելու հարցը

եւ խոստանում էր, որ կիրիկիահայերը կ'ապստամբեն եւ կարճ ժամանակում երկրամասը կ'ազատագրեն թուրքերից: Դա բաւական խորաթափանց դիւանագիտական առաջարկ էր, քանի որ դրանով կիրիկիայի հայերը ոչ միայն կը խոստափէին կոտորածներից ու տեղահանութիւնից, այլեւ իրաւունք կը ստանային պատերազմից յետոյ ինքնավարութիւն պահանջել՝ որպէս կռուող կողմ:

1915 թ. գարնանից երիտթուրք ջարդարները սկսեցին հայերի գանգուածային տեղահանութիւններն ու կոտորածները: 1915 թ. ապրիլի 16-ին Թիֆլիսի Ազգային բիւրօն դիմեց Կաթողիկոսին՝ Պ. Նուպարին ուղարկելու Եւրոպա, որպէսզի չէզոք երկրների ուղարկութիւնը հրաւիրի հայկական կոտորածների վրայ, եւ դրանք դադարեցնելու միջոցներ ձեռնարկուեն¹⁷: Ապրիլի 28-ին Կաթողիկոսը կոնդակ ուղարկեց Պ. Նուպարին՝ նրան լիազօրելով անմիջապէս մեկնել Եւրոպա եւ դիմումներ կատարել չէզոք պետութիւններին, որպէսզի նրանց միջնորդութեամբ դադարեցուեն հայկական կոտորածները, ինչպէս նաեւ աշխատանքներ տանի Հայաստանի ինքնավարութեան համար¹⁸:

Մայիսի 9-ին Ազգային պատուիրակութեան նախագահը ժամանեց Փարիզ, ուր Ազգային բիւրոյի ներկայացուցիչ, նշանաւոր հասարակական-քաղաքական գործիչ Յակոբ Զաւրեանի հետ կազմեց Հայաստանի ինքնավարութեան ծրագիր: Այդ ծրագրով ստեղծուելու էր ինքնավար Հայաստան՝ սուլթանի անուանական գերիշխանութեան ներքոյ ու եւրոպացի գեներալ-նահանգապետի գլխաւորութեամբ: Հայաստանը գտնուելու էր Ռուսաստանի, Անգլիայի եւ Ֆրանսիայի խնամակալութեան ներքոյ: Ինքնավար Հայաստանը ընդգրկելու էր Արեւմտեան Հայաստանի վեց նահանգները եւ Կիրիկիան՝ Մերսին նաւահանգստով, իսկ Ալեքսանդրէթը

դուրս էր մնալու, որպէսզի խոստափեն Անգլիայի ու Ֆրանսիայի ընդդիմութիւնից¹⁹:

Ինչպէս տեսնում ենք, դեռեւս անկախ Հայաստանի մասին խօսք չկար, այլ միայն նախատեսուում էր ինքնավարութիւն ձեռք բերել սուլթանի անուանական գերիշխանութեան եւ տէրութիւնների հովանու ներքոյ: Դրանից աւելին պահանջել տուեալ պարագայում անիրագործելի էր, եւ Պ. Նուպարը ճիշտ էր ըմբռնել միջազգային իրազրութիւնը:

Յ. Զաւրեանը տեղեկացրեց Պ. Նուպարին, որ Ֆրանսիան եւ Ռուսաստանը գաղտնի համաձայնութիւն են կնքել, որով յաղթանակից յետոյ Արեւմտեան Հայաստանն անցնելու էր Ռուսաստանին, իսկ Կիրիկիան՝ Ֆրանսիային, սակայն ցարական կառավարութիւնը զղջացել էր եւ հայերին հրահրում էր պահանջել Կիրիկիան՝ խոստանալով ինքնավարութիւն տալ²⁰: Դրանից ելնելով էլ Ազգային պատուիրակութիւնը Անգլիայի ու Ֆրանսիայի քաղաքական շրջաններին ներկայացրեց միացեալ եւ ինքնավար Հայաստանի նախագիծը: Պ. Նուպարը, յենուելով Եւրոպայի քաղաքական ու ֆինանսական աշխարհում իր ունեցած կապերի վրայ, ընդարձակ լոբբիստական աշխատանքներ ծաւալեց:

Տէրութիւնների ներկայացուցիչները, չնայած հայ գործիչների հետ հանդիպումների ժամանակ դրական էին արտայայտուում Հայաստանի ինքնավարութեան ծրագրի կապակցութեամբ, սակայն հարցի լուծումը կապում էին պատերազմի աւարտի հետ եւ խոստափում էին այդ առթիւ պաշտօնական յայտարարութիւններ անելուց: Նրանց շահերի բախումը թոյլ չէր տալիս որոշակի խոստումներ տալ, մանաւանդ՝ Հայաստանի ապագայի վերաբերեալ իրենք այլ ծրագրեր ունէին:

1916 թ. մայիսին Սալթս-Պիկո-Սազոնով պայմանագրով Անգլիան, Ֆրանսիան

եւ Ռուսաստանը գաղտնի համաձայնութիւն կնքեցին պատերազմից յետոյ Օսմանեան կայսրութեան մասնատման վերաբերեալ: Հայաստանը բաժանուելու էր երկու մասի. Ռուսաստանին էին անցնելու էրզրումի, Վանի, Բիթլիսի վիլայէթները, իսկ Ֆրանսիային՝ Սեբաստիան, Դիարբէքիւրը, Խարբերդը եւ Կիրիկիան:

Յարական կառավարութիւնը ոչ միայն ետ կանգնեց պատերազմի սկզբում հայերին տուած խոստումներից, այլեւ որոշեց իր գրաւած հայկական նահանգներում բնակեցնել ռուս եւ կազակ վերաբնակիչներին, իսկ հայ գաղթականներին արգելեց վերադառնալ իրենց օջախները: Ռուսաստանի տմարդի քաղաքականութիւնը, որի հետ այնքան մեծ յոյսեր էին կապուած, խոր հիասթափութիւն էր հայ ժողովրդի համար:

Ակնյայտ դարձաւ, որ միացեալ Հայաստանի ստեղծման գաղափարը դատապարտուած էր անյաջողութեան: Այս պայմաններում Պ. Նուպարը որդեգրեց նոր քաղաքականութիւն՝ ինքնավար Հայաստան՝ Ռուսաստանի եւ ինքնավար Կիրիկիա՝ Ֆրանսիայի հովանու տակ:

Պ. Նուպարը Ֆրանսիային անցնելիք հայկական տարածքներին ինքնավարութիւն տալու հարցը դիտեց գլխաւոր պայման, երբ Ֆրանսիան նրան առաջարկեց ստեղծել Հայկական լեգէոնը: Ֆրանսիացի քաղաքական գործիչները խոստացան ինքնավարութիւն տալ Կիրիկիային²¹, սակայն այդ մասին պաշտօնական յայտարարութիւն անելուց տարբեր պատրուակներով խոստափեցին՝ չնայած Պ. Նուպարի բազմաթիւ դիմումներին ու բողոքներին: Ինչպէս ապագան ցոյց տուեց, Ֆրանսիան իրականում մտադրութիւն չուներ Կիրիկիային ինքնավարութիւն տալ, այլ միայն ձգտում էր ստանալ հայերի գործուն աջակցութիւնը, որի կարիքը այդ ընթացքում շատ էր զգուս:

1916 թ. դեկտեմբերի 28-ին Ֆրանսիական կառավարութեան ներկայացուցիչ ժորժ Պիկոն Պ. Նուպարին առաջարկեց հնարաւորութեան սահմաններում պահանջել միացեալ Հայաստանի ստեղծում Ֆրանսիայի հովանու ներքոյ²²: Այսպիսով, դերերը փոխուել էին, եւ այժմ Ֆրանսիան էր հայերին դրդում պահանջելու միացեալ Հայաստան, անշուշտ, իր հովանու ներքոյ: Պ. Նուպարը գիտակցում էր, որ միացեալ երկրի ստեղծումը կապուած է մեծ ջանքերի հետ եւ փորձում էր բաց չթողնել նոյնիսկ ամենափոքր հնարաւորութիւնը: Նա յոյս ունէր, որ Ֆրանսիան, ի տարբերութիւն Ռուսաստանի, որը փոխել էր իր քաղաքականութիւնը Հայաստանի հանդէպ, լինելով առաւել ժողովրդավարական երկիր, ինքնավարութիւն կը տար հայերին:

Պ. Նուպարի այդ լաւատեսութիւնը, մեր կարծիքով, այնքան էլ հիմնաւոր չէր, քանի որ «ասպետական» Ֆրանսիան, ինչպէս տեսանք, ամէն կերպ խոստափում էր յայտարարել, որ պատերազմից յետոյ իր ազդեցութեան տակ անցնող հայկական տարածքներին ինքնավարութիւն է շնորհելու: Սակայն Ազգային պատուիրակութեան նախագահը ստիպուած էր համակերպուել: Հայ քաղաքական գործիչներին այլ բան չէր մնում, քան համագործակցել այս կամ այն հզօր պետութեան հետ՝ յուսալով, որ նրանք ինչ-որ չափով կը բարելաւեն հայ ժողովրդի վիճակը:

1917 թ. փետրուարեան յեղափոխութիւնը նոր հեռանկարներ բացեց Հայկական հարցի արդարացի լուծման համար: Ապրիլի 11-ին Կաթողիկոսին ուղարկած նամակում Պ. Նուպարը համոզմունք էր յայտնում, որ Արեւմտեան Հայաստանի ճակատագիրը լուծուելու է առաջին հերթին Ռուսաստանի լիբերալ կառավարութեան կողմից²³: Պ. Նուպարը կրկին հակուեց Ռուսաստանի միջոցով Հայաստանը ազատագրուած տեսնելու գաղափարին:

Նա գիտակցում էր, որ Ֆրանսիան համեմատաբար ժողովրդավարական երկիր էր եւ աւելի ընդարձակ ազատութիւններ կարող էր տալ Հայաստանին, սակայն Ֆրանսիան տարածական առումով հեռու էր, իսկ Ռուսաստանը անմիջական հարեւան էր, աւելի մեծ շահեր ունէր տարածաշրջանում, ռուսական զօրքերն էին գրաւել Հայկական նահանգները եւ, բնականաբար, այդ տարածքները այլ պետութեան չէր գիշի, ինչպէս նաեւ Կովկասի՝ իր ենթակայութեան հայաբնակ շրջանների հարեւանութեամբ թոյլ չէր տայ, որ այլ պետութեան հովանու ներքոյ ինքնավար Հայաստան ստեղծուի: Ռուսաստանի լիբերալ կառավարութեան հետ կապուած Պ. Նուպարի լաւատեսական յոյսերը շուտով սկսեցին իրականութիւն դառնալ:

1917 թ. ապրիլի 27-ին Ռուսաստանի ժամանակաւոր կառավարութիւնը ստորագրեց Թրքահայաստանի վերաբերեալ հրամանագիր, որով ռուսական բանակի գրաւած Հայկական տարածքները կառավարելու էր ընդհանուր կոմիսարը, որն անմիջապէս ենթարկուելու էր կառավարութեանը²⁴: Կոմիսարի քաղաքացիական գծով տեղակալ նշանակուեց Յ. Զաւրեանը, իսկ Հայ գաղթականները իրաւունք ստացան վերադառնալ աւերուած օջախները: Իսկ մայիսի 22-ին Ֆրանսիայի Ազգային ժողովում վարչապետ Ռիբօն յայտարարեց, որ իր երկիրը հրաժարուած է գաղութացման քաղաքականութիւնից²⁵: Իրադարձութիւնները կարծես թէ ընթանում էին Հայ ժողովրդի շահերին ու ձգտումներին համընթաց:

Այդ պայմաններում Պ. Նուպարը կրկին վերադարձաւ միացեալ եւ ինքնավար Հայաստան ստեղծելու գաղափարին, որից ժամանակին ստիպուած էր եղել հրաժարուել ցարիզմի վարած գաղութային քաղաքականութեան հետեւանքով: Նա միացեալ Հայաստան արտայայտութեան

տակ նկատի ունէր Արեւմտեան Հայաստանի վեց նահանգներն ու Կիլիկիան եւ անհրաժեշտ էր համարում երկիրը դնել Անտանտի պետութիւնների ընդհանուր հովանու ներքոյ, իսկ նրանցից մէկը (գերադասելի էր համարում Միացեալ Նահանգները) պէտք է 10-15 տարով ստանձնէր երկրի մանդատը՝ պաշտպանելու արտաքին յարձակումներից եւ աջակցելու քայքայուած տնտեսութեան վերականգնմանը²⁶: Այդ ոգով էր խմբագրուած 1917 թ. մայիսի 24-ին Պ. Նուպարի կողմից դաշնակիցներին ուղղուած յուշագիրը՝ «Յուշագիր շայկական հարցի եւ Հայաստանի ազատագրման վերաբերեալ»²⁷:

Սակայն 1917 թ. Հոկտեմբերեան յեղափոխութիւնը Ռուսաստանում, 1918 թ. Թրքական բանակի ներխուժումը Արեւմտեան Հայաստան, ապա արշաւանքը դէպի Արեւելեան Հայաստան, ծանր կացութիւն ստեղծեց ոչ միայն Հայկական հարցի արդարացի լուծման համար, այլեւ վտանգեց Հայ ժողովրդի գոյութիւնն առհասարակ:

Եւ միայն 1918 թ. Մայիսեան հերոսամարտերն էին, որ թուրքերին թոյլ չտուեցին աւարտին հասցնել 1915 թ. սկսած ոճրագործ ծրագիրը:

1918 թ. Հոկտեմբերին արդէն պարզ էր պատերազմում Թուրքիայի պարտութիւնը, եւ օրակարգում էր նրա կապիտուլացման հարցը: Հոկտեմբերի 29-ին Պ. Նուպարը դիմեց Անտանտի երկրներին, որպէսզի հայերին ճանաչեն պատերազմող կողմ. «Ազգային Պատուիրակութիւնը կը կարծէ թէ թափուած արիւնը հարիւր հազարաւոր հայերուն, որոնք ջարդուեցան Համաձայնականներու դատին հաւատարիմ մնալու համար եւ մերժած ըլլալուն համար Թուրքաց կողմէ եղած առաջարկները, որով անոնց կը խոստացուէր անկախութիւն՝ ի վարձատրութիւն Դաշնակիցներու դէմ ըլլալիք աջակցութեան, նաեւ բոլոր զոհողութիւնները, որոնց ենթար-

կուեցան հայերը կամաւորապէս՝ պայքարելով Ֆրանսայի, Պաղեստինի, Հայաստանի եւ Կովկասի ճակատներուն վրայ, ոչ միայն կ'արդարացնեն իբր պատերազմիկ ազգ ընդունուելու իրենց պահանջը, այլ եւ առ այդ իրենց իրաւունք կու տան»²⁸, գրում էր Պ. Նուպարը:

1918 թ. Հոկտեմբերի 30-ին Մուզրոսում կնքուեց զինադադարի պայմանագիր²⁹ Դաշնակիցների եւ պարտուած Թուրքիայի միջեւ: Նոյեմբերին Պ. Նուպարը Ֆրանսիական մամուլին տուած հարցազրոյցում ներկայացրեց այն սկզբունքները, որոնց շնորհիւ պէտք է լուծուէր Հայկական հարցը՝

1. Այլեւս ոչ մի կապ թուրքական պետութեան հետ,
2. Հայկական պետութիւնը ունենալու է հանրապետական վարչաձեւ եւ դրուելու է ազատարար ազգերի պաշտպանութեան տակ, որոնցից մէկը ստանձնելու է Հայաստանի խնամակալութիւնը մինչեւ այն կազմակերպուի եւ կարողանայ ինքնուրոյն գոյատեւել,
3. Հայաստանի մէջ են մտնելու վեց վիլայէթները եւ Կիլիկիան:

Պ. Նուպարը նչեց ռուսական Հայաստանի նկատմամբ որեւէ պահանջ չուենալու մասին, սակայն եւ յոյս յայտնեց, որ նոր սկզբունքներ որդեգրած Ռուսաստանը, որը յայտարարել է Լեհաստանին ու Ֆինլանդիային անկախութիւն տալու մասին, հայոց հարցում նոյնպէս արդարացի մօտեցում կը ցուցաբերի³⁰:

Այդ սկզբունքները Պ. Նուպարը գարգացրեց դեկտեմբերին հրատարակած «Յուշագիր Հայկական հարցի մասին» գրքոյկում³¹: Նա անհրաժեշտ էր դիտում վեց վիլայէթներից, Կիլիկիայից ու Մարաշի սանջակից հայկական պետութեան ստեղծումը, որը, մինչեւ վերջնական կազմակերպուելը, կը դրուէր որեւէ պետութեան խնամակալութեան տակ: Պ. Նուպարը

ընչու էր, որ այդ պետութեանը հետագայում կը միանայ նաեւ Արարատեան Հանրապետութիւնը, որով եւ Հայաստանը, ըստ էութեան, պատենշ կը հանդիսանայ պանթուրքիզմի ծաւալումներին:

Հայաստանում հայերի փոքր թուի խնդրի առթիւ նա ցոյց էր տալիս, որ երբ 1821 թ. Յունաստանը անկախութիւն ստացաւ, այնտեղ մնացել էին ընդամէնը 400.000 յոյներ: Իսկ խնդրի բարոյական կողմին անդրադառնալով՝ անհաւանական էր համարում, որ Եւրոպայի ու Ամերիկայի ժողովրդավարները թոյլ կը տան, որ յաղթանակի «Աբդուլ Համիդի, էնվերի ու Թալէաթի քաղաքականութիւնը»՝ Հայկական հարցը վերացնել բնաջնջելով Հայ ժողովրդին³²:

Ինչպէս ժամանակը ցոյց տուեց, Եւրոպայի ու Ամերիկայի «հայասէր» ղեկավարները չխորշեցին արդարացնել «հայասպանութիւնը» եւ սեփական ճղճիմ շահերի համար սեղմեցին թուրքերի արիւնոտ ձեռքերը: Մինչդեռ Հայ քաղաքական գործիչները անհամբեր սպասում էին Դաշնակիցների մեծահոգի վճռին, քանի որ չէին հաւատում, որ իրեն արդարամիտ ու քաղաքակիրթ համարող արեւմտեան աշխարհի համար հայերի արիւնը աննշան կաթիլ էր լինելու նրանց քաղաքական ու ֆինանսական խարդաւանքների ճանապարհին:

1918 թ. նոյեմբերի 30-ին Պ. Նուպարը ի լուր աշխարհի յայտարարեց «Ամբողջական Հայաստանի» անկախութիւնը: Յայտարարութեան մէջ նշուած էր. «...Հայ ազգը ունի մշակոյթի եւ քաղաքակրթութեան աստիճանը, որ իրեն իրաւունք տայ ինքզինքը կառավարելու: ... Հետեւաբար, համաձայն միակամ փափաքին հանուր Հայ ազգին, որուն մէկ մասը արդէն Անկախ Հանրապետութիւն մը կազմած է, Ազգ. Պատուիրակութիւնը ... կը յայտարարէ Ամբողջական Հայաստանի Անկա-

խոսվածը Դաշնակից Պետությունն էր և Միաց. Նահանգներու պաշտպանությունն էր և կամ Ազգերու Դաշնակցությունն անմիջապես որ ան կազմուի»³³:

Իսկ "La Voix de l'Arménie" թերթում տպագրած իր յօդուածում Պ. Նուպարը շեշտեց Թուրքա- եւ Ռուսահայաստանների միաւորմամբ Միացեալ Հայաստանի ստեղծման կենսական անհրաժեշտութիւնը: «Հայաստանը պէտք է ըլլայ մէկ, ամբողջ, ազատ, անկախ,- գրում էր նա,- ա՛յս է ահա Հայ արիւնոտ դատի միակ արդար լուծման միակ Հաստատուն գրաւակա- նը»³⁴:

Թուում էր՝ մօտ է միասնական անկախ Հայաստանի ստեղծումը, եւ Հայ ժողովուրդը կը կարողանայ վերջնականապէս միաւորուել միասնական Հայրենիքում, իսկ «ռուսա» եւ «թուրքա» եզրերը, ի վերջոյ, կը պոկուեն Հայաստան անուան վրայից: Պ. Նուպարը անսահման հաւատ ունէր Հայաստանի լուսաւոր ապագայի հանդէպ եւ, ինչպէս տեսանք, առաջինն էր, որ յայտարարեց միասնական Հայրենիք ստեղծելու անհրաժեշտութեան մասին՝ ոչ միայն Օսմանեան, այլեւ՝ Ռուսական կայսրութեան Հայկական տարածքների միաւորմամբ: Անշուշտ, այդտեղ արտայայտուած էր կորսուած անկախ պետականութիւնը վերականգնուած տեսելու Հայ ժողովրդի դարաւոր ձգտումը, սակայն Հայոց ցեղասպանութիւնը անհնարին էր դարձրել սեփական ուժերով ազգային նպատակին հասնելու հեռանկարը, իսկ յոյսը օտարների վրայ դնելուց առաջ պէտք էր ունենալ հմուտ պետական-քաղաքական գործիչների փաղանգ: Սակայն գրեթէ վեցհարիւրամեայ անիշխանական վիճակը թոյլ չէր տուել Հայութեանը մշակելու ազգային դիւանագիտական ինքնութեան աւանդոյթներ:

Այսպիսով, Պ. Նուպարը առաջ քաշեց «ծովից ծով» Հայաստանի գաղափարը, ո-

րը, նրա կարծիքով, կարող էր իրականութիւն դառնալ Դաշնակիցների եւ առաջին հերթին՝ Միացեալ Նահանգների աջակցութեամբ, քանի որ վերջինս նկատուում էր Հայաստանի մանդատի գլխաւոր թեկնածուն: Միամտութիւն կար, իհարկէ, Պ. Նուպարի՝ մեծ պետութիւնների ազնուութեան ու մարդասիրութեան հանդէպ հաւատի մէջ, քանի որ այդ տէրութիւնների ղեկավարները Ազգային պատուիրակութեանն պարզորոշ արգելեցին մասնակցել Փարիզի հաշտութեան վեհաժողովին, իսկ զինադադարի պայմանագրով Հայաստանը թողեցին թուրքերի անվերահսկելի «վերահսկողութեան» տակ³⁵:

Աւելի համեստ եւ Հայ ժողովրդի տուեալ պահի իրատեսական հնարաւորութիւններից բխող պահանջներով էին հանդէս գալիս Հայաստանի Հանրապետութեան վարիչները: ՀՀ կառավարութիւնը Փարիզ ուղարկեց պատուիրակութիւն՝ հասարակական-քաղաքական գործիչ, գրող Աւետիս Ահարոնեանի գլխաւորութեամբ, որի առջեւ խնդիր էր դրուած պահանջել Հայաստանի սահմաններում ընդգրկել Անդրկովկասի Հայկական տարածքները, Վանի, Բիթլիսի, Էրզրումի, Խարբերդի, Դիարբէքի, Սեբաստիայի վիլայէթները եւ ելք դէպի Սեւ ծով: Եթէ չյաջողուէր ապահովել այդ սահմանները, ապա պէտք է հրաժարուէին Խարբերդի, Դիարբէքի, Սեբաստիայի վիլայէթներից, Գանձակի ու Թիֆլիսի նահանգների որոշ շրջաններից, սակայն ծովային ելքի պահանջը մնում էր առաջնային: Գերադասելի էր համարուում մանդատը յանձնել այնպիսի պետութեան, որը շատ չէր միջամտի երկրի գործերին³⁶:

Ինչպէս տեսնում ենք, ՀՀ իշխանութիւնները շրջանցում էին Կիլիկիայի խնդիրը: Դա ունէր մի քանի հիմնաւորում. նախ, Կիլիկիան գտնուում էր Ճրանսիայի ազդեցութեան գօտում, եւ վերջինս այն դժուար թէ զիջէր Հայաստանին, երկ-

րորդ՝ Եղեռնից արիւնաքամ Հայ ժողովուրդը չէր կարող իր ուժերով գրաւել եւ պահել այդ ընդարձակ տարածքները:

Սակայն Ա. Ահարոնեանը, 1919 թ. փետրուարին ժամանելով Փարիզ, համակերպուեց Պ. Նուպարի «ծովից ծով» պահանջներին եւ ՀՀ արտգործնախարարին ուղարկած նամակում դա պատճառաբանեց հետեւեալ կերպ.

1. Բոլոր թրքահայերն ու Պ. Նուպարը առանց Կիլիկիայի Հայաստանն ընկալել չեն կարող եւ չեն էլ ուզի, եւ, եթէ ինքը չհամաձայնի նրանց հետ, ապա պառակտումն անխուսափելի կը դառնայ,

2. Ամերիկան միայն Կիլիկիայի միջոցով կարող էր օգնել Հայաստանին, քանի որ Սեւ ծովի ափին յարմար նաւահանգիստ չկար,

3. Եթէ Կիլիկիան մնայ Ճրանսիային, ապա վերջինս այն կը կցի Սիրիային եւ բաւական ստուար հայութիւն կը կտրուի Հայրենիքից,

4. Հայութեան փրկուած հատուածի մեծ մասը կիլիկիացի կամ սուեփացի են եւ ոչ մի պայմանով նրանք չեն գնայ խոպան ու աւէր Հայկական լեռնաստանը: Պոլսի, Ջմիւռնիայի եւ Եգիպտոսի հայերը նոյնպէս միայն Կիլիկիա կը գնան: Բացի այդ ոչ մի պետութիւն, Կիլիկիայից բացի, Ֆինանսական ներդրումներ չի կատարի Հայաստանի այլ վայրերում, ուր ուշադրութեան արժանի ոչինչ չկար³⁷:

Պ. Նուպարը եւ Ա. Ահարոնեանը փետրուարի 26-ին Փարիզի վեհաժողովին ներկայացրեցին Հայկական պահանջների վերաբերեալ միասնական յուշագիր³⁸: Այդտեղ տրուած էր Հայկական հարցի համառօտ պատմութիւնը, Հայկական կոտորածները պատերազմի տարիներին, Հայերի պայքարը դաշնակիցների կողքին եւ պահանջում էին հայերին ճանաչել կոռուղ կողմ: Ըստ յուշագրի՝ Հայաստանը ընդգրկելու էր հետեւեալ տարածքները.

1. Վան, Բիթլիս, Դիարբէքի, Խարբերդ, Էրզրում, Սեբաստիա եւ Տրապիզոն, առանց Տիգրիսից հարաւ եւ Օրդու-Սեբաստիա գծից արեւմուտք ընկած շրջանների, որոնք բնակեցուած էին հիմնականում մահմեդականներով,

2. Կիլիկիայի չորս սանջակները՝ Մարաշ, Խոզան (Միս), Ջեբէլ-Բերեքէթ եւ Ադանա՝ Ալեքսանդրէթ նաւահանգստով,

3. Կովկասի Հայկական Հանրապետութեան տարածքը. Երեւանի նահանգը, Թիֆլիսի նահանգի հարաւային մասը, Գանձակի նահանգի հարաւ-արեւմտեան մասը, Կարսի նահանգը՝ առանց Արդահանից հիւսիս ընկած շրջանի:

Նշուում էր, որ չպէտք է հաշուի առնել ցեղասպանութեան հետեւանքով հայերի թուի նուազումը Հայաստանում: «Անթոյլատրելի է, որ ոճիրներից օգուտ քաղեն նրանց հեղինակները եւ նրանք հասնեն իրենց հրեշաւոր ծրագրի նպատակին - ապահովել մահմեդականների մեծամասնութիւնն ու գերակայութիւնը»³⁹: Մատնանշուում էր, որ բացի բարոյականից կայ նաեւ գործնական կողմ. «Հայերը միակ տարրն են, որ ի վիճակի են այժմ քաղաքակրթութեան եւ պրոգրեսի ընդունակ մի պետութիւն կազմելու»⁴⁰: Խոստանում էին Հայկական պետութեան մէջ ազատութիւններ տալ ազգային փոքրամասնութիւններին: Անհրաժեշտ էր համարուում որեւէ պետութեան աջակցութիւնը երկրի կազմակերպման, տնտեսական ու ֆինանսական վերականգնման գործում: Սակայն այդ օժանդակութիւնը չպէտք է ստանար պրոտեկտորատի կերպարանք, եւ մանդատը տրուելու էր առաւելագոյնը 20 տարով: Նաեւ պահանջուում էր վնասների հատուցում Թուրքիայից:

Ինչպէս տեսնում ենք, Հայ գործիչները ձգտում էին ստեղծել միասնական Հայկական պետութիւն, որի մէջ չէին ներառուելու այլադաւաններով ու այլազգիները.

րով բնակեցուած շրջանները եւ յարգուելու էին ազգային փոքրամասնութիւնների իրաւունքները: Իսկ երկրի հովանաւորութիւնը այլ պետութեան էր յանձնուելու ժամանակաւորապէս՝ տնտեսապէս քայքայուած երկրին օգնելու եւ արտաքին յարձակումներից պաշտպանելու համար:

Այսպիսով, 1912 թ. առաջ քաշուող պարզ բարենորոգումների խնդրից 1915 թ. Հայկական հարցը դարձաւ ինքնավարութեան պահանջ, իսկ պատերազմում թուրքիայի պարտութիւնը առաջնահերթ դարձրեց միացեալ եւ անկախ Հայաստան ստեղծելու հրամայականը:

Հայկական կողմը գերադասում էր ԱՄՆ հովանաւորութիւնը, քանի որ այդ երկիրը յայտնի էր ժողովրդավարական կայուն սկզբունքներով, մինչ այդ շատ չէր միջամտել Ասիայի ու Եւրոպայի երկրների ներքին գործերին, ինչպէս նաեւ Հայաստանից հեռու էր, եւ փոքր էր վերջինս գաղութացնելու գայթակղութիւնը:

1919 թ. ապրիլի 17-ին Պ. Նուպարն ու Ա. Ահարոնեանը հանդիպեցին Միացեալ Նահանգների նախագահ Վուդրօ Ուիլսոնի հետ: Վերջինս նշեց, որ եթէ Ամերիկան որեւէ մանդատ վերցնի, ապա դա կը լինի Հայաստանինը, քանի որ հայերը մեծ համակրանք են վայելում իր երկրում: Նախագահը խոստացաւ նաեւ, որ ապագայ Հայաստանի սահմանները կը լինեն մօտաւորապէս Հայկական կողմի պահանջներին համապատասխան⁴¹:

Սակայն տէրութիւնները ոչ միայն խոստումներից այն կողմ չանցան, այլեւ Հայկական պահանջները խիստ ընդդիմութեան հանդիպեցին Յրանսիայի կողմից, որը ձգտում էր Կիլիկիան միացնել Սիրիային: Այստեղ պէտք է նշել նաեւ հայկական կողմի մեղքը, որը չկարողացաւ լեզու գտնել Ֆրանսիացիների հետ, որոնք հայերի հանդէպ բաւական բարեացակամ էին Կիլիկիան գրաւելու առաջին ամիսներին:

Դա պայմանաւորուած էր նաեւ այն հանգամանքով, որ Կիլիկիան պահող ուժը սկզբնական շրջանում Հայկական լեգէոնն էր: Սակայն հայ-ֆրանսիական յարաբերութիւնները հետզհետէ վատթարացան, ինչը բացասաբար ազդեց Հայկական հարցի վրայ:

Փարիզի հաշտութեան վեհաժողովում պարզ դարձաւ, որ տէրութիւնները Հայկական հարցում ցաւակցութիւններից ու խոստումներից այն կողմ անցնելու մտադրութիւն չունեն: Նրանք ո՛չ զինուոր, ո՛չ էլ դրամ էին նախատեսում հայ ժողովրդի ձգտումները եւ պատերազմի տարիներին տուած խոստումները իրականացնելու համար: Ի վերջոյ, հասկանալով տէրութիւնների դիւանագիտական խարդաւանքների էութիւնը, հայ պատուիրակները ստիպուած էին չափաւորել իրենց պահանջները:

1920 թ. փետրուարին Լոնդոնի կոնֆերանսում Պ. Նուպարն ու Ա. Ահարոնեանը արդէն չէին պահանջում Կիլիկիան, այլ բաւարարուած էին միայն այդ երկրամասի համար ինքնավարութեան հեռանկարով Յրանսիայի հովանու ներքոյ⁴²:

Այժմ հայ պատուիրակների համար պարզ էր Կիլիկիան Հայաստանին միացնելու ձգտումների անհնար լինելը եւ ձգտում էին այն թողնել թէկուզ Յրանսիայի հովանու ներքոյ, բայց արդէն ուշ էր:

1920 թ. մարտի 16-ին Սահմանադրման յանձնաժողովը հայկական կողմին տեղեկացրեց, որ Հայաստանը դրուելու է Ազգերի լիգայի հովանու տակ, քանի որ ոչ մի պետութիւն չէր համաձայնել վերցնել մանդատը, իսկ հայերը պէտք է բաւարարուէին՝ Հայաստանի Հանրապետութեանը կցելով Վանը, Բիթլիսը, Մուշը եւ էրզրումը՝ առանց հասնելու Երզնկային:

Սակայն ապրիլի 18-24-ը Սան Ռեմոյի խորհրդաժողովում Անգլիայի վարչապետ Լիոյդ Ջորջն ու Իտալիայի վարչապետ

Յրանչեսկօ Նիտտին կասկածի տակ դրեցին նաեւ էրզրումի՝ Հայաստանին միացնելու հաւանականութիւնը: Պ. Նուպարը եւ Ա. Ահարոնեանը մեծ ջանքեր գործադրեցին, որպէսզի համոզեն էրզրումը տալ Հայաստանին: Ի վերջոյ, ապրիլի 24-ին տէրութիւնների ղեկավարները որոշեցին Հայաստանի մանդատը առաջարկել Ամերիկային, իսկ չվերցնելու դէպքում ԱՄՆ-ի նախագահին էին թողնում Հայաստանի սահմանների գծումը՝ Տրապիզոնի, էրզրումի, Բիթլիսի եւ Վանի վիլայէթների սահմաններում:

Դրանով տէրութիւնները իրենց ձեռքերը լուացին եւ Հայաստանի սահմանագծումը յանձնեցին Ուիլսոնին՝ քաջ գիտակցելով, որ հայերը սեփական ուժերով նոյնիսկ Հայաստանի Հանրապետութեան սահմանները չեն կարող պաշտպանել օրէցօր հզօրացող քեմալական թուրքիայի յարձակումից, որի ռազմական յաջողութիւնները պայմանաւորուած էին Դաշնակիցների «անփութութեամբ», քանի որ պատերազմում պարտուելուց յետոյ թուրքերը ինչ-ինչ նկատառումներով չզինաթափուեցին:

Հետագայում Լ. Ջորջը քննադատեց Սան Ռեմոյում «Պօղոսի կախարդական հեքիաթները» եւ Ահարոնեանի «կոյր լաւատեսութիւնը»⁴³: «Դժուար էր պատկերացնել հայկական դիրքերի անյուսալիութեան եւ անհոգ անփութութեան աւելի վառ ապացոյց,- գրում է Լ. Ջորջը,- քան այն, թէ ինչպիսի յայտարարութիւններով էին հանդէս գալիս վերին աստիճանի տաղանդաւոր այդ ժողովրդի ականաւոր ներկայացուցիչները, որոնցից կախուած էր նրա ապագան՝ որպէս անկախ ազգ»⁴⁴: Գուցէ եւ ճիշտ էր Լ. Ջորջը, երբ քննադատում էր Պ. Նուպարի ու Ա. Ահարոնեանի վարած քաղաքականութիւնը, սակայն մոռանում էր մի պարզ փաստ, որ հայ գործիչները ծանօթ չէին Եւրոպայի երկերեսանիւ-

թեանն ու ապերախտութեանը, չէին հաւատում, որ իրենց ժողովրդավար կոչողները կարող են սեղմել թուրքերի արիւնոտ ձեռքը եւ կը մոռանային իրենց փոքր դաշնակցին, որն աւելի շատ արիւն էր թափել պատերազմում, քան եւրոպական մեծ տէրութիւնները:

Պ. Նուպարը դեռ յոյս ունէր, որ Ամերիկայի նախագահի պատասխանը չի ուշանայ մանդատը վերցնելու հարցում, եւ այն «նպաստաւոր պիտի ըլլայ»⁴⁵: Չնայած Ուիլսոնը կողմնակից էր Հայաստանի մանդատը վերցնելուն, սակայն նա մեծամասնութիւն չունէր Կոնգրեսում եւ Սենատում: 1920 թ. յունիսի 1-ին ամերիկեան Սենատը 52 կողմ, 23 դէմ ձայներով բանաձեւ ընդունեց Հայաստանի մանդատը մերժելու մասին⁴⁶: Այսպիսով, Ամերիկայի հետ հայերի կապած յոյսերը յօդս ցնդեցին:

Պ. Նուպարը 1920 թ. մայիսի 6-ին հանդիպեց Յրանսիայի վարչապետ Միլերանի, իսկ մայիսի 10-ին՝ նախագահ Դեշանէլի հետ: Այդ հանդիպումներից պարզ դարձաւ, որ Յրանսիան Կիլիկիան յանձնելու էր թուրքերին, իսկ ՀՀ-ին սպառնացող բոլշեւիկեան վտանգի դէմ ոչինչ չէր ձեռնարկի⁴⁷: Այսպիսով, նոյնիսկ Յրանսիայի հովանու ներքոյ Կիլիկիան պահելու երազանքն էր յօդս ցնդում: Այն բոլոր յոյսերը, որ հայերին համակել էին պատերազմի աւարտից յետոյ, վերափոխուած էին յուսահատութեան ու տագնապի:

1920 թ. օգոստոսի 10-ին Փարիզի Սեւր արուարձանում յաշտութեան պայմանագիր կնքուեց Դաշնակից պետութիւնների եւ Օսմանեան կայսրութեան միջեւ: Պայմանագիր, որին հայ ժողովուրդը սպասում էր պատերազմում թուրքիայի պարտութիւնից ու զինադադարի կնքումից ի վեր, այսինքն՝ մէկուկէս տարի: Այդ պայմանագրի հետ էր կապուած հայութեան երազանքների իրականացումը: Այն

ստորագրեց նաև ՀՀ պատուիրակութեան նախագահ Ա. Ահարոնեանը: Ըստ դրա՝ Հայաստանի եւ Թուրքիայի սահմանագիծը որոշելու էր ԱՄՆ նախագահ Ուիլսոնը, եւ այն անցնելու էր Տրապիզոնի, Էրզրումի, Բիթլիսի, Վանի վիլայեթներով⁴⁸:

Սակայն այդ պայմանագիրն արդէն ուշացած էր, եւ այն իրականութիւն դարձնելու հնարաւորութիւններ չկային, քանի որ դաշնակիցների դանդաղկոտութեան հետեւանքով Թուրքիայում սկսուել եւ մեծ թափ էր ստացել քեմալական շարժումը: Ուիլսոնը Չերչիլը Սեւրի պայմանագրի մասին հետագայում նշում էր. «13 ամիս նախապատրաստուող այդ փաստաթուղթը հնացաւ աւելի շուտ, քան պատրաստ էր»⁴⁹:

Հայերը պայմանագիրը ընդհանուր առմամբ խանդավառութեամբ ընդունեցին, քանի որ դրանով Հայաստանին տրուում էին հետագայ զարգացման համար անհրաժեշտ կենսատարածքներ եւ ելք դէպի ծով: Միաժամանակ հայկական ընդարձակ տարածքներ մնացին Թուրքիին, այդ թուում՝ Կիլիկիան, ուր վերադարձել եւ նոր կեանք էին սկսել տասնեակ հազարաւոր հայեր՝ հաւատալով Յրանսիայի խոստումներին: Բացի այդ, պարզ էր, թէ ինչպէս պէտք է քեմալականներից ազատագրուէին հայկական տարածքները:

Օգոստոսի 14-ին Պ. Նուպարը նոտա յղեց Խաղաղութեան վեհաժողովի նախագահ Միլերանին⁵⁰: Նա բողոքեց Կիլիկիան եւ Խարբերդը Թուրքիին թողնելու առթիւ, պահանջեց այդ տարածքները յանձնել Յրանսիայի հովանաւորութեանը եւ նշեց, որ Հայ ազգային պատուիրակութիւնը չի դադարելու պահանջել այդ տարածքները: Սակայն Պ. Նուպարի բողոքի նոտան, բնականաբար, անուշադրութեան մատնուեց, քանի որ երկու տարուայ քննարկումներից յետոյ, եթէ տէրութիւնները որոշել էին Կիլիկիան թողնել Թուր-

քերին, ապա պայմանագրի ստորագրումից մի քանի օր յետոյ չէին փոխի իրենց քաղաքականութիւնը:

1920 թ. դեկտեմբերի 1-ին Պ. Նուպարը «Կիլիկիայի հարցի ներկայ վիճակը» վերնագրով յուշագիր ներկայացրեց Ֆրանսիական կառավարութեանը: Նա առաջարկում էր Կիլիկիայում ստեղծել ինքնավար քրիստոնեայ վարչութիւն՝ Յրանսիայի հովանու ներքոյ եւ խառը ոստիկանութիւն՝ Ֆրանսիացի սպաների հրամանատարութեան ներքոյ: Ըստ նրա՝ այդ լուծումը չէր հակասի Սեւրի դաշնագրին, կը պահպանէր Ֆրանսիական շահերը երկրամասում, մարդկային եւ նիւթական նոր յատկացումներ չէին պահանջուի, ինչպէս նաև հնարաւորութիւն կը տար խաղաղութիւն պահպանել Սիրիայի հիւսիսում: Նա շեշտում էր, որ միայն Կիլիկիայում աւելի մեծ տնտեսական շահեր կային, քան Յրանսիային անցած միւս երկրամասերում միասին վերցրած⁵¹:

Ի միջի այլոց, այդ ծրագիրը բաւական իրատեսական էր, սակայն Յրանսիան արդէն փորձում էր մերձեցում ստեղծել քեմալական Թուրքիայի հետ եւ ապահովել իր տնտեսական շահերը, ինչի հետեւանքով զոհաբերեց հայկական Կիլիկիան:

Կիլիկիայում ինքնավարութիւն ստանալու քաղաքականութիւնը խրախուսում էին նաև անգլիացի որոշ քաղաքագէտներ, որոնք անյոյս էին համարում Արեւմտեան Հայաստանի ազատագրումը եւ, նոյնիսկ, մինչեւ Սեւրի պայմանագիրը Ազգային պատուիրակութեանը խորհուրդ էին տալիս հայութեան բեկորները համախմբել Կիլիկիայում եւ Ֆրանսիական մանդատի ներքոյ կազմել «ազգային բոյն մը»⁵²:

1921 թ. փետրուարի 17-ին Անգլիայի արտաքին գործերի նախարարութիւնում կազմուած մի փաստաթղթում նոյնպէս նախատեսուած էր Հայաստանին յանձնել

միայն մինչեւ 1914 թ. ռուս-թուրքական սահմանները, իսկ արեւմտահայերին տեղաւորել Կիլիկիայում, ուր պէտք է ինքնավարութիւն տրուէր հայերին՝ Թուրքիայի գերիշխանութեան եւ Ազգերի լիգայի հովանու ներքոյ⁵³:

1921 թ. փետրուարի 26-ին Պ. Նուպարն ու Ա. Ահարոնեանը ներկայացան Լոնդոնի խորհրդաժողովին⁵⁴: Հայ պատուիրակները պահանջեցին Սեւրի համաձայնագրի դրոյթները պահպանել, իսկ Կիլիկիային ինքնավարութիւն շնորհել:

Ինչպէս տեսնում ենք, հայ պատուիրակները շարունակեցին պահանջել Սեւրի պայմանագրի գործադրութիւնը Հայաստանի համար: Դա քաղաքական ռոմանտիզմի վառ դրսեւորում էր: Նոյնիսկ 1920 թ. ապրիլին Սան Ռէմոյում անհնար էր համարուում այդ տարածքները գրաւել Թուրքերից, իսկ հայ-թուրքական պատերազմում Հայաստանի պարտութիւնից յետոյ դրա մասին մտածելն անգամ անմտութիւն էր: Յոյսը դաշնակիցների ռազմական եւ նիւթական աջակցութեան վրայ դնել հայ պատուիրակները չէին կարող, քանի որ տէրութիւնները վաղուց էին հրաժարուել Հայաստանին զինուոր կամ դրամ տրամադրելուց:

Մարտի 4-ին Լոնդոնի խորհրդաժողովը որոշեց փոփոխութիւններ մտցնել Սեւրի պայմանագրի՝ Հայաստանին վերաբերող մասում, եւ Թուրքիային առաջարկեցին իր արեւելեան տարածքների վրայ կազմել հայկական «Ազգային տուն», որի սահմանները որոշելու էր Ազգերի լիգայի կազմած յանձնաժողովը⁵⁵: «Լոնտոնի մէջ Հայերուն տրուելիք «Ազգային Տուն»ը կու գար քանդուել Սեւրի մէջ տրուած «Միացեալ եւ անկախ Հայաստան»ի օգուտով շէնքը»⁵⁶, - գրում է ռամկավար գործիչ Ա. Դարբինեանը: Իսկ պատմաբան Գալուստ Գալոյեանը նշում է. «Լոնդոնի դաշնակցային խորհրդաժողովը, ըստ էութեան,

չեղեալ յայտարարեց Սեւրի պայմանագիրը, չնայած այն իր պաշտօնական ձեւակերպումը գտաւ միայն Լոզանի խորհրդաժողովում: Դա այն վարձն էր, որ տրուում էր քեմալականներին բուլշեւիկեան Ռուսաստանի դէմ պայքարելու համար, որից տուժեցին նաև հէնց իրենք՝ դաշնակիցները»⁵⁷:

Այսպիսով, դաշնակիցները միացեալ Հայաստանի փոխարէն Լոնդոնում առաջարկեցին Ազգային տուն կամ օջախ՝ Թուրքիայի «արեւելեան վիլայեթներում»: Սակայն այդ չափազանց համեստ ծրագիրը եւս մնաց թղթի վրայ՝ Թուրքերի սուր ընդդիմութեան հետեւանքով: Իսկ 1921 թ. աշնանը Յրանսիան Թուրքիային յանձնեց Կիլիկիան, եւ տեղի հայերը ստիպուած էին կրկին վերցնել գաղթականի ցուպը:

Պ. Նուպարը իր 7-8 տարիների ազգային գործունէութիւնից յետոյ մեծ ցաւով ու հիասթափութիւններով 1921 թ. աշնանից հեռացաւ իր պաշտօնից: 1930 թ. յուլիսի 18-ին արդէն մահուան մահճում գտնուող Պ. Նուպարը իր վերջին խօսքն ուղղեց հայ ժողովրդին, ուր անդրադարձաւ նաև Ազգային պատուիրակութեան նախագահի պաշտօնում իր գործունէութեանը. «Ձեզի ծանօթ են այն գեղեցիկ հեռապատկերները, որ կը գծուէին մեր աչքերուն առջեւ, այն ամենածանր զոհողութիւններէն ետք, զոր ժողովուրդ մը երբեւիցէ ըրած է իր ազատութեան համար: Աւանդ, գիտէի նաև այն ահաւոր յուսախաբութիւնները, զոր արդարութեան վճռումի պահուն, մեր մեծ դաշնակիցներուն եսասիրութիւնն ու ապերախտութիւնը վերապահեցին մեզի իբրև միակ վարձքը մեր հաւատարմութեան: Այդ աղետալի օրէն ի վեր, իմ ճգնուած սիրտս իր վէրքերով միայն ապրեցաւ»⁵⁸:

Ինչպէս տեսանք, Պ. Նուպարը Հայկական հարցի ասպարէզ մտաւ 1912 թուականից եւ մինչեւ 1921 թ. յամառօրէն

պայքարեց Հայուժեան շահերի պաշտպանութեան համար: Սկզբնական փուլում (բարենորոգումների շրջան) նա հանդէս էր գալիս ամենահամեստ պահանջներով, սակայն 1915-ից որդեգրեց միացեալ եւ «ծովից ծով» Հայաստանի գեղեցիկ, բայց անիրականանալի քաղաքականութիւնը:

Պէտք է նշել, որ Հայկական հարցի վրայ բացասաբար էին ազդում նաեւ Պ. Նուպարի վատ յարաբերութիւնները Հայաստանի Հանրապետութեան իշխանութիւնների եւ Ա. Ահարոնեանի հետ, ինչը հնարաւորութիւն չէր տալիս աւելի սերտ համագործակցել, չնայած դրական էր այն, որ օտար պետութիւնների առջեւ միասնական յուշագրերով, դիմումներով ու պահանջներով էին հանդէս գալիս:

1912-1921 թթ. Հայ ժողովրդի պատմութեան ամենավճռական փուլերից էին: Ժամանակաշրջան, որի ընթացքում մեր ժողովուրդը ենթարկուեց ամենադաժան փորձութիւնների ու կանգնեց ամենազեղեցիկ երազանքները իրականացած տեսնելու տեսլականի առջեւ: Այդ ամէնի բովով անցաւ նաեւ Ազգային պատուիրակութեան նախագահ, ազգային մեծ բարերար Պօղոս Նուպար փաշան: Նրա գործունէութիւնը այդ տարիներին անմնացորդ նուիրում էր հարազատ ժողովրդին ու Հայրենիքին: Եւ ինչպէս Հայ ժողովուրդը, նա նոյնպէս պարեց բոլոր հիասթափութիւններն ու դառնութիւնները, որոնցով լեցուն էին այդ տարիները:

ԾԱՆՕԹԱԳՐՈՒԹԻՒՆՆԵՐ

- 1 Հայաստանի ազգային արխիւ (ՀԱԱ), ֆոնդ 57, ցուցակ 5, գործ 27, թերթ 1-2:
- 2 Ե. Օտեան, Պօղոս փաշա Նուպար, Կ. Պոլիս, 1913, էջ 4:
- 3 Հայաստանը միջազգային դիւանագիտութեան եւ սովետական արտաքին քաղաքականութեան փաստաթղթերում (1828-1923), խմբագիր Ջ. Սիրակոսեան, Երեւան, 1972, էջ 128:
- 4 Նոյն տեղում, էջ 130-148:
- 5 Ե. Օտեան, անդ, էջ 63:

- 6 Վ. Մալեգեան, Ծամբուս վրայ, Փարիզ, 1950, էջ 309:
- 7 Ապահովութեան խորհուրդը կազմաւորուեց 1912 թ. դեկտեմբերին եւ գործում էր Կ. Պոլիսի Հայոց Պատրիարքի նախագահութեամբ: Նրա նպատակն էր համակարգում ձեռով հետապնդել եւ իրագործել Հայկական բարենորոգումների խնդիրը:
- 8 ՀԱԱ, ֆ. 57, ց. 5, գ. 33, թ. 35:
- 9 Լեո, Հայոց հարցի վաւերագրերը, Թիֆլիս, 1915, էջ 314-329:
- 10 Ժողովածոյ դիւլոմատիքական դոկումենտների: Բարենորոգումները Հայաստանում 1912 թ. նոյեմբեր 12-ից մինչեւ 10 մայիս 1914 թ., թարգմ. Ս. Աւագեան, Թիֆլիս, 1915, էջ 102-104:
- 11 «Արարատ» ամսագիր, Ս. Էջմիածին, 1914, օգոստոս, էջ 697-706:
- 12 ՀԱԱ, ֆ. 57, ց. 5, գ. 28, թ. 108:
- 13 Նոյն տեղում, գ. 58, թ. 64-65:
- 14 Геноцид армян в Османской империи. Сборник документов и материалов под редакцией М. Г. Персияна. Ереван, 1983, ст. 275-276.
- 15 Հայաստանը միջազգային դիւանագիտութեան ... փաստաթղթերում, էջ 372:
- 16 Boghos Nubar's Papers and the Armenian Question 1915-1918. Documents. Edited and translated by Vatche Ghazarian. Waltham, 1996, p. 3-5.
- 17 ՀԱԱ, ֆ. 57, ց. 5, գ. 28, թ. 161-162:
- 18 ՀԱԱ, ֆ. 57, ց. 5, գ. 27, թ. 30-31:
- 19 Boghos Nubar's Papers, p. 80-84.
- 20 ՀԱԱ, ֆ. 430, ց. 1, գ. 26, թ. 9:
- 21 Boghos Nubar's Papers, p. 372-374.
- 22 Նոյն տեղում, էջ 422-424:
- 23 Նոյն տեղում, էջ 432-433:
- 24 Ս. Վրացեան, Հայաստանի Հանրապետութիւն, Երեւան, 1993, էջ 26-27:
- 25 Boghos Nubar's Papers, p. 437.
- 26 Նոյն տեղում, էջ 438:
- 27 ՀԱԱ, ֆ. 430, ց. 1, գ. 26, թ. 14-15: Նաեւ՝ Վ. Մելիքեան, Թուսաստանի ժամանակաւոր կառավարութիւնը եւ Հայկական հարցը 1917 թ., ՊԲՀ, 1994, թիւ 1-2, էջ 130:
- 28 Լ. Աճեմեան, Եգիպտոսի տարեցոյց 1925, Ադեքսանդրիա, 1924, էջ 87:
- 29 Հայաստանը միջազգային դիւանագիտութեան ... փաստաթղթերում, էջ 537-539:
- 30 «Վերածնունդ», Փարիզ, 14 նոյեմբեր, 1918, թիւ 21-22: «Ծակատամարտ», Կ. Պոլիս, 6 յունուար, 1919, թիւ 43:
- 31 Memorandum on The Armenian Question. Presented by the Armenian National Delegation. Paris. 1918.
- 32 Նոյն տեղում, էջ 7-8:

- 33 ՀԱԱ, ֆ. 282, ց. 1, գ. 46, թ. 1: Նաեւ՝ Լ. Աճեմեան, Եգիպտոսի տարեցոյց 1925, էջ 89-91:
- 34 «Ծակատամարտ», Կ. Պոլիս, յունուար, 1919, թիւ 40:
- 35 Հայաստանը միջազգային դիւանագիտութեան ... փաստաթղթերում, էջ 537-539:
- 36 ՀԱԱ, ֆ. 200, ց. 1, գ. 193, թ. 10-12:
- 37 Նոյն տեղում, թ. 154-155: Նոյն տեղում, ց. 2, գ. 47, թ. 2-3:
- 38 Հայկական հարցը Հաշտութեան կոնֆերանսի առաջ, Թիֆլիս, 1919:
- 39 Նոյն տեղում, էջ 7:
- 40 Նոյն տեղում:
- 41 ՀԱԱ, ֆ. 200, ց. 2, գ. 49, թ. 1: Նաեւ՝ Ա. Ահարոնեան, Սարդարապատից մինչեւ Սեւր եւ Լոզան, Երեւան, 2001, էջ 23-24:
- 42 ՀԱԱ, ֆ. 57, ց. 5, գ. 215, թ. 1-2: Նաեւ՝ Ա. Ահարոնեան, Աջ. աշխ., էջ 59-63:
- 43 Ллойд Джордж, Правда о мирных договорах, т. 2, Москва, 1957, ст.433-438.
- 44 Նոյն տեղում, էջ 437:
- 45 ՀԱԱ, ֆ. 174, ց. 1, գ. 1, թ. 1:
- 46 Ա. Եսայեան, «Հայկական հարցը» եւ միջազգային դիւանագիտութիւնը, Երեւան, 1965, էջ 194:

- 47 Զաւէն Արք. Եղիայեան, Պատրիարքական յուշերս, Գահիրէ, 1947, էջ 340-342:
- 48 Հայաստանը միջազգային դիւանագիտութեան ... փաստաթղթերում, էջ 676-677:
- 49 Черчилль У., Мировой кризис, М-Л., 1932, стр. 258.:
- 50 ՀԱԱ, ֆ. 57, ց. 5, գ. 224, թ. 12: Նաեւ՝ «Հայրենիք» օրաթերթ, Պոսթըն, 1920, հոկտեմբեր 6, թիւ 2566:
- 51 ՀԱԱ, ֆ. 412, ց. 1, գ. 2206, թ. 1-5:
- 52 ՀԱԱ, ֆ. 282, ց. 1, գ. 54, թ. 2:
- 53 Հայաստանը միջազգային դիւանագիտութեան ... փաստաթղթերում, էջ 696:
- 54 Նոյն տեղում, էջ 697-704:
- 55 Ա. Դարբինեան, Հայ ազատագրական շարժման օրերէն, Փարիզ, 1947, էջ 479-480:
- 56 Նոյն տեղում, էջ 480:
- 57 Գ. Գալոյեան, Հայաստանը եւ մեծ տէրութիւնները 1917-1923 թթ., Երեւան, 1999, էջ 435:
- 58 Ոսկեմատեան Հայկական բարեգործական ընդհանուր միութեան 1906-1931, Փարիզ, 1935, էջ 12: